

摘藻堂四庫全書薈要

集部

欽定四庫全書小會要

集部

小畜集卷二十

四至
七

詳校官助教臣常循



欽定四庫全書薈要卷一萬四千一百四十九

集部

小畜集卷二十四

宋 王禹偁 撰

表

西京謝上表

謝聖惠方表

謝手詔別錄賜生辰國信表

謝傳宣撫問表

為壽寧節不任朝覲奏事狀



奏姪男表

謝賜姪男大理評事表

繳連壽寧節功德疏表

代呂相公讓起復第二表

代王侍郎讓官表

代呂相公讓右僕射表

為宰臣以彗星見求退表

又謝恩表

為兵部向侍郎謝恩表

為溫侍郎謝除禮部尚書表

為兵部張相公謝官表

為史館李相公讓官表

西京謝上表

臣某言伏奉恩制授臣西京留守已於今日到任上
訖乍遠龍庭初臨龜洛望冕旒而積戀對宮闕以知榮
伏念臣素乏宏才偶逢開國歷兩朝而竊祿叨三入以

無功去歲因染沉疴懇辭重位抗表止期於致仕出綸
復委於留司四上讓章願罷已行之命載蒙答詔未諧
往訴之誠慮堅臥以要君遂力疾而受命此蓋陛下情
深念舊禮極退人遂令朽衰之年享此殊常之事入則
榮提相印冠四輔以調元出則分務神皋守三公而在
外仍啓荀池之貴彌彰洛宅之雄增老臣無德之殃實
近古未行之典永言寵遇無與比倫而自感泣朝辭扶
力上道乍臨理所彌耀殘年奉列聖之宗祧覩百司之

典故對兩觀而寧忘戀闕俯三川而更切朝宗謁太祖
之園陵魂銷弓劍掃先臣之墳墓淚滴松楸念往追思
既榮且懼惟慙潦倒不稱居留亦當虔奉朝經旁詢屬
吏卧治上憑於聖化求醫庶便於微軀固無裨補之功
但感始終之道

謝聖惠方表

臣某言今日得進奏院狀報十日准御書院劄子奉
聖旨降太平聖惠方第五十一卷至一百卷并排門目

錄一卷共五十一冊並用紫綾裝褙黃絹作簽仰進奏院遞到西京賜臣者宸眷曲迴上方新製聖惠本霑於黎庶天慈續賜於老臣欲令病廢之軀再獲康寧之福謝伏惟尊號皇帝陛下與世作範視民如傷窮百病之根源選十全之方術爰自朱邸逮于紫宸垂十五年成一百卷救疾病疔瘍之理盡金石草木之情莫不岐伯秦和獻其伎術倉公扁鵲奏其方書辯五聲五色之微察九竅九藏之動御製別加於序引生靈咸識於指歸

笑玄宗廣濟之方一何太簡繼黃帝親嘗之理千古同
輝頃以模印未全施行不廣臣方居黃閣首被鴻恩常
恐此生不見全集豈謂陛下曲存終始再有頒宣窺天
愈覺於高明觀海莫知其涯涘惠過反魂之藥功深起
甕之鍼進奏謝恩恐自殊於方鎮拜章叙感猶竊比於台
司更延遲暮之年實自生成之德臣無任感天荷聖激
切屏營之至

謝手詔別錄賜生辰國信表

臣某言今日伏蒙聖慈差臣男某官押賜臣生辰者
天眷迴光私門積耀方動劬勞之感忽承睿聖之知舉
族為榮百身何報伏念臣才非兼濟運偶重熙一言無
補於宸聰三入徒塵於相位向以虛羸遘疾筋力不支
優容猶列於上台拜謁不拘於常禮死難塞責方期伏
枕以上章疾既有瘳亦合懸車而告老尚戀文明之德
冀伸補報之心豈謂陛下特記生辰曲迴睿眷衣襲六
宮之製器分三品之珍出鞍馬於內閑分綵繒於天府

惟慙老朽不稱鮮華無褐無衣益負下民之媿有始有卒空知上聖之恩惟思苦口之言以盡致君之節過此以往莫知所為

謝傳宣撫問表

臣某言臣男某押生辰國信至伏蒙聖慈召赴崇政殿面傳宣示撫問者俯聽聖語如對天顏涕泣感恩兢惶失次伏念臣遭逢有素功業無聞亦嘗潛數昔賢畧徵近代劉仁軌處保釐之任功著征遼裴晉公兼將相之

權勲高伐蔡稱為國老不愧後人臣無此勤勞有此名
位未諧休退常負憂虞豈意生辰尚闕聖念特垂寵錫
俾耀哀殘詞臣草詔於玉堂已循往例家丁授宣於金
口事則非常萬死百身終難補報無任涕咽感恩之至
為壽寧節不任朝覲奏事狀

臣伏念沉痾未愈聖節將臨顧筋力以不支望雲天而
積恨既乖修覲莫敢寧居竊以臣自偶昌朝久叨貴任
入則位崇於三事累玷台司出則名冠於諸侯謬塵居

守凡闕慶賀皆合率先而況壽寧嘉辰節名新改當百
辟稱觴之日是二年伏枕之餘歷夏經秋有增無減莫
預歡呼之會僅成病廢之身天邊空仰於流虹牀下尚
迷於鬬蟻傾堯日而雖全葵藿通虞泉而自念桑榆遐
瞻北極之光恨無迅翼善禱南山之壽但有精誠臣無
任祈天祝聖激切憂惶之至

奏姪男表

臣前件姪男某早慕通修比求科試既未精於舉業難

輕入於文場尋以奏授朝恩補充衙內隨從已經於三
任蹉跎遂滯於一名況四房昆弟之間惟有此姪念千
載君臣之分恐失良時倘蒙甄錄之恩粗有公勤之誠
干犯宸扆無任兢惶激切之至

謝賜姪男大理評事表

右臣伏蒙聖慈授臣姪男某大理評事者祇荷寵光不
任榮懼伏以法寺美官聖朝好爵凡云選授必擇器能
豈期不調之材遽忝起家之命伏念臣姪男某稟訓雖

久知書未深但以補署職名侍行藩鎮既蹉跎而有素
恐仕進以無階爰因誕聖之辰輒有量材之請伏蒙尊
號皇帝陛下不循常例特降殊恩賜猶子之官常念老
臣之衰暮諒殺身而何報空舉族以知榮臣無任

繳連壽寧節功德疏表

右伏以河清社鳴千載啓興王之運天長地久萬邦傾
祝聖之心居留既冠於台司虔禱寧同於庶位是以集
祇園之開士啓秘藏之真經仰讚雲天不舍晝夜鐘梵

鐙洋於四水香花煥耀於六街預期華渚之星已滿周
天之月仗西方之聖教祝南面之至尊庶使星望帝車
與金輪而永固山齊聖壽歷沙劫以長存臣無任

代呂相公辭起復第二表

草土臣某言臣方處哀摧忽聞恩命泣血負罪號天自
陳詔旨未從荒迷殆絕謝中伏念臣變調無狀侍養乖方
於國於家非忠非孝不自殞滅招此鞠凶敢期苦塊之
間更被絲綸之命伏望尊號皇帝陛下曲行恩例過念

遭逢雖荷寵榮恐傷風教況古人重及親之祿君子有
終身之喪臣雖不才粗聞斯義必將負一坏之土封五
尺之墳慰泉下之幽魂赴天下之達禮固非飾詐乃是
常情伏望陛下少抑恩私姑全大體寢茲成命俾執通
喪免令不孝之名有辱具瞻之地臣無任叫天叩地哀
號殞絕之至

代王侍郎讓官表

臣某言今日伏蒙聖慈賜臣官告一通勅牒一道特

授臣戶部侍郎叅知政事兼加階勲爵邑者位列貳卿

職叅四輔雖聽成命實懼曠官叫天閭而自卜遠圖懷

帝澤而誠非飾詐謝中伏念臣才非命世學謝通儒雕蟲

強繼於家門射鵰敢希於科第不謂策名之日適當出

震之期垂衣方霈於殊恩釋褐不循於常調未經歷試

使立班行不出數年俄居近密佐乃聖乃神之主為旅

進旅退之人有何謨猷裨益政化至于斷決機務無非

稟聽聰明尸祿居多黜幽有待雖聖情之未咎在物議

而可驚豈謂尊號皇帝陛下猥以謏才入叅大政在青
壇之行慶雖舉彛章佐黃閣之持衡是為非據而又階
勲並進爵邑兼榮苟或不辭豈為度德且陳力就列有
不能則止之言惟器與名有不可假人之議願改已行
之命免貽將至之殃伏望陛下特寢新恩令居舊位靡
厚素餐之罪庶無覆餗之虞臣則老在諫垣終於密地
永知止足敢有覬覦獲避斯權是為多福

代呂相公讓右僕射表

臣某言今日伏奉制命授臣守尚書右僕射仍改賜
功臣者平章三事績効無聞師長百僚恩榮不次雖聽
已行之命實懷非據之憂伏念臣猥以常才驟逢昌運
擢第偶叨於殊級効官徧歷於清華皆自聖知實無公
望頃者入叅大政遂正中樞雖堅報主之心且昧化民
之術炎涼屢換尸素彌多洎免鼎司猶居家宰六卿分
職既首冠於班行五日延英但祇奉於朝請省躬知忝
沒齒為榮豈意謬荷聖恩復登台席避讓不獲兢惶失

容自再秉鈞衡遽懼寒暑雖身非土木粗欲答於鴻私
而職昧經綸終無裨於至化有辜重任罔稱具瞻固合
黜自廟堂放歸田里楊于著位以勵事君伏蒙尊號皇
帝陛下曲念遭逢俯存終始特加端揆仍賜功臣矜其
不逮之心所謂退人以禮然而中臺峻秩右相古官若
台司無狀之人處會府彌高之位則具僚安仰後代何
觀伏望陛下少抑私恩顯從公議特追前詔別授散官
庶使好進之流詎敢妄動不才之士得以少懲區區懇

誠實非飾讓干犯宸嚴無任感天荷聖激切

為宰臣以彗星見求退表

臣某言臣聞平章百姓任繫於安危冊免三公必因於
災異覩上玄之示譴居大位以何顏伏念臣等俱乏宏
才濫司庶政昧變調之至理乖啓沃之嘉謨徒以先帝
誤知驟加擢用聖君嗣統曲示優容歲月屢更弼諧無
狀既失具瞻之望果貽覆餗之愆數日以來妖星忽見
謀人之國蓋皇化之未孚代天之工致乾文之告變此

而不責何以致君伏惟尊號皇帝陛下舜孝奉先堯心
稽古勵克勤之至德推好問之虛懷循列聖之丕基守
而勿失委大臣之政柄用之弗疑無一事不賜詢求無
一言不蒙聽納上下之情靡間小大之政可行所宜臻
福慶於黔黎召休祥於蒼昊而星緯若此廟謨可知是
乃元首至明股肱不稱之明驗也伏以君臣同體非人
不居陰陽未和擢士為相乃邦家之令典今古之彛章
伏望陛下思宗社之遠圖惜廟堂之重任旁求巖穴博

採摺紳俯順人心上答天誠必生良弼用協聖猷克致
和平坐銷變咎臣等不勝昂足恥對朝行明降繹綸放
歸田里免玷秉鈞之地甘為擊壤之民用此終身實為
多幸臣等無任叨榮竊祿戰汗待罪之至

又謝恩表

臣等言近以變生乾象罪在鼎司再上封章懇避廊廟
伏奉批答未賜允俞中謝竊以休咎之徵繫于政教宰輔
之任職在燮調得人則降祥非人則示譴惟天降鑒若

影隨形伏念臣等備位三台歷事二聖既不能內安百姓使盡闢於汙萊又不能外撫四夷俾載橐於弓矢但妨賢路莫報國恩遂致和氣未融星文失度易云又誰咎也語曰于汝安乎是以願罷鈞衡請求輔弼庶銷天誡克致時雍伏蒙陛下薦降絲綸曲形敷諭雖未加放逐而實不遑寧復况避正殿於宸居減太官之常膳引萬方之罪皆在聖躬退三舍之妖必迴天意臣等尚容待罪彌積厚顏當主憂臣辱之時抱尸祿素餐之過免

冠伏闕再三慮黷於天聰碎首縻軀萬一冀伸於臣節
敢不精求理本廣察物情討論國經勤恤人隱議邊防
之措置評刑政之弛張庶幾上減焦勞旁銷氛祲稍逃
官謗免辱聖知區區之誠實在於此臣等無任感天荷
聖激切屏營之至

為兵部向侍郎謝恩表

臣某言伏奉制書入參朝政拜章陳讓答詔不從兢憂
失圖黽勉就位伏念臣出于寒素偶玷科名先帝誤知

驟加擢用聖君嗣統未忍棄遺在臣心而自知聽物論
之難處豈謂尊號皇帝陛下特頒綸命俾佐鼎司職在
弼諧事關理亂自非抱訐謨之業有變通之方上可以
啓沃四聰下可以贊成三事則何以副播紳之佇望塞
宵旰之虛懷是敢具述懇誠願罷光寵陛下不移前詔
終辱天恩再三慮黷於天心萬一冀傾於臣節又念兩
朝近侍五稔叨榮雖覆載之恩終無補報幸犬馬之力
未甚衰殘謹當知無不為退思補過調四時於玉燭誠

愧昔賢誓一命於鴻毛寧忘死地臣無任感天荷聖激切屏營之至

為溫侍郎謝除禮部尚書表

臣某言伏奉聖慈授臣禮部尚書者罷替鼎司美遷宗伯推恩掩過省已慙魂伏念臣跡本孤貧才非秀茂當先期之踐祚遇丹陛之較文自忝科名動踰涯分驟登密勿罔効涓埃雖竭精誠略無獻替洎罷歸諫署出領藩條奔走五年遷移四郡徇公之志中外不渝戀闕之

心朝昏在望先皇帝召從荆渚俾佐台司未伸致主之
誠遽逼上仙之數薄命雖在孤魂已銷伏遇尊號皇帝
陛下統嗣丕基遵承先旨特遷官秩曲示優容又換炎
涼卒無裨補引退難輕於去就戀恩遂涉於因循一事
蔑聞兩朝冒寵宜從遠貶用戒將來伏蒙陛下曲念遭
逢特存終始峻陟六卿之列罷叅三事之權塵茲顯官
未塞公議古人所謂進則負天下之望退不失六曹尚
書者臣今是也南宮踈遠北極崇高欲報鴻恩未知死

所臣無任

為兵部張相公謝官表

臣某言臣仰遵帝令再踐鼎司無非常之才負天下之

望任重德薄以榮為憂中謝伏念臣猥以庸材驟登貴仕

前忝三事行將二年憂畏則多輔弼無効罷歸左轄尋

改正卿遷移數州奔走萬里屬先朝厭代方泣血於終

天洎聖主承祧幸嘗叅而就日甘在散地以終此生豈

謂尊號皇帝陛下過求舊臣曲奉先旨委以萬務冠于

三台聖眷則隆物論未允懇疏陳讓宸慈弗俞勉就巖
廊若墜淵谷方今皇澤雖廣黔黎未康西北邊防不無
屯戍東南土俗亦有災傷當陛下宵衣旰食之時責微
臣富國安人之術將何智略以副倚毗但念生逢聖朝
年過知命不敢愛死或期報恩苟捨短以從長庶以勞
而補過涕洟兢惕不知所為臣無任

為史館李相公讓官表

臣某言伏覩制命授臣守本館平章事監修國史者台

輔正名策書重職載循非據曷稱具瞻夙夜以來神魂

飛越

謝

伏以承天之序王者所以闡鴻猷秉國之鈞宰

相所以熙庶績代天理物負重位高苟非英賢必見壅

敗伏念臣才非拔俗世乏顯官爰自策名適逢昌運繼

箕裘之業位以過於先臣踐臺閣之資身久妨於賢路

太宗皇帝擢叅大政莫著微功冒榮則多無狀罷去皇

帝陛下初昇望苑慎擇官僚叨賓護之重名佐元良之

茂德蔑聞輔導空積歲時伏遇陛下纂嗣皇圖復陪相

府送往事居之節但極哀榮庇民尊主之方實無措置
聽于物議有玷聖猷豈謂陛下過念遭逢特加倚注命
之為相恐累知人况呂端以黃髮重名退居傳保李至
乃青宮同列出守藩維獨臣瑣材當此重任乍聞綸命
實駭朝端將何以踐三事之崇高居兩朝之通顯苟昧
知難之旨必貽覆餗之憂伏望陛下博採播紳旁求巖
穴必有經綸之器出膺宵旰之心惟廟堂之任得宜則
祖宗之業不墜由衷斯在得請為期臣無任

第二表

臣某言自承制命尋拜封章未賜允俞不遑啓處謝中伏
以知人安民謂之聖主度德量力謂之通賢苟冒寵榮
必平倚注豈獨失具瞻之望亦恐傷則哲之明伏惟尊
號皇帝陛下負荷二聖之基勤求萬幾之務必欲化人
成俗與古為徒所宜擇間傑之才輔文思之德然後內
安百姓外撫四夷使社稷永康揚太祖太宗之業聖賢
相遇成可久可大之功物論人心所望若此如臣斗筭

小器章句諸生但以遭逢遂居通顯先皇帝擢從內署
俾贊中樞莫効涓埃空更歲月洎退居散地自誓終身
豈期際會儲宮列漢皇之四皓踐揚相府預虞舜之五
臣當陛下鋪張政教之時是微臣傾竭謨猷之日徒有
致君之志實微經國之才行將二年未立事業久妨賢
路又正台司時來而身不自知詔下而人應失色伏望
陛下特迴成命別付鉅賢俾伸夔契之才用助虞唐之
化庶陳力就列遂不能則止之心惟器與名得不可假

人之道言非飾讓情逼知難伏閤拜章期于得請臣無任

小畜集卷二十四

欽定四庫全書薈要卷一萬四千一百五十

集部

小畜集卷二十五

宋 王禹偁 撰

牋啓

賀皇太子牋

皇太子賀正牋

皇太子賀冬牋

謝除右拾遺直史館啓

謝除左司諫知制誥啓

謝除禮部員外郎知制誥啓

謝除翰林學士啓

謝除刑部郎中知制誥啓

上宰相謝免判吏部南曹啓

迴寇密直謝官啓

謝僕射相公求致仕啓

迴司空相公謝官啓

迴孫何謝秘書丞直史館京西轉運副使啓

薦戚綸上翰林學士錢若水啓

迴尹黃裳啓

賀皇太子牋

某言今日降到赦書一道皇太子殿下光膺冊命正
位儲宮凡在普天不勝大幸伏以三代舊章百年墜典
舉茲盛禮允屬昌期伏惟殿下稟氣塗山誕祥甲觀蘊
間平之茂德早冠親賢邁啓誦之多才式當儲副既協
人神之望永隆邦國之基某謬忝專城嘗叨內署正衙

宣冊陪駕序以無階僻郡効官拜龍樓而尚遠無任抃躍

皇太子賀正牋

某言伏以元正首祚萬物咸新趨北闕以朝天啓東宮而應律伏惟皇太子殿下重輪發彩少海澄波蘊克勤克儉之風著惟忠惟孝之節王畿千里隨木鐸以行春君門九重捧金壘而上壽應時納祐與國同休某權佩魚符遙瞻雞戟無任

皇太子賀冬牋

某言伏以晷運推移日南長至啓東朝而受賀爰舉舊
章詣北闕以稱觴率先群后伏惟皇太子殿下日躋盛
德天縱多才忠孝克奉於君親謙讓動詢於師友寢門
侍膳誕彰三至之勤望苑禮賢永作萬邦之本應時納
祐與國同休某叨列通班爰當亞歲無任抃蹈

謝除右拾遺直史館啓

右某啓蒙恩特授前件官充職者位列諫垣職兼史氏

雖聽已行之命難逃非據之言極荷寵榮不任感懼恭
以獻箴規於諫署必待正人彰善惡於史書宜歸直筆
矧茲庸賤遽有忝塵伏念某門第本寒才華不秀鄉庠
里塾從師而纔識姓名畫地書空力學而稍通經史明
代方求於翹楚高堂漸逼於桑榆因持濫吹之竽來示
藏家之箴雖春官與進薦叨隗始之名而明主求人果
矢廬前之望然而紫庭擢第白屋知榮衡茆惹丹桂之
香布素曳藍袍之色里閭改觀親族生光洎邑佐絃歌

任移銅墨廷評乃士官之屬不謂冗僚縣事則諸侯之
權豈言下位甘隨常調敢歎徒勞固無易俗之能惟待
黜幽之典豈期賤吏誤達宸聰把籬畔之菊花方多憔悴
近堦前之萸英頓覺光輝而又召詣黃扉顯加明試
深虞孤陋有負品題序賀雪之詩固多膚淺賦履冰之
什愈見荒唐既有黷於宸嚴詎敢期於天獎方在端憂
之際忽驚非次之恩芝函乍降於人寰棘寺驟歸於諫
署職兼館殿地極清華通宵未息於怔忡詰旦遽諧於

告謝綠袍褫處休貽碧鶴之譏朱紱行來但負維鷄之
刺備忽忘而簡橫象齒耀搢紳而帶飾犀文荷王澤之
霑濡空驚浹背對天顏之咫尺惟誓殺身夫何寒賤之
人有此遭逢之事此皆相公尼丘借峻文曲生光數仞
牆邊暗展鑄顏之力如椽筆下潛施與點之恩遂令清
切之資光被孤平之士亦猶涇渭為事遽邀列地之封
鷄鵠呈災誤享鈞天之樂顧藝行之無取荷生成之有
歸得不慎守當官恪共其職況無遺之可拾幸有瑞而

必書編修出綽之言垂於信史撰著得賢之頌播在樂
章少施染削之勞上答受知之地過此已往未知所裁
謝除左司諫知制誥啓

右某啓蒙恩特授前件官充職者位遷中諫職列西垣
祇荷寵光不任感懼竊以伏青蒲而獻可合求補袞之
才吟紅藥以搞詞尤重演綸之地豈期庸賤玷此清華
伏念某才非秀民世本寒族適會文明之運濫肩仕進
之流叅常調以起家永甘縣吏寘周行而通籍俄在諫

垣加以叨館殿之清資豫校讎之美職以日繫月方期
讀天下之書自邇陟遐不意掌禁中之誥載循所自必
有攸歸此皆相公文曲分光才江借潤遂使自天之命
詎求批鳳之才裂地而封翻及不龜之手得不更精文
翰上答品題恪事一人少贖素餐之咎虔遵四禁用酬
黃閣之知過此以還未知所措卑情不任感恩榮懼終
始知歸之至

謝除禮部員外郎知制誥啓

右某啓蒙恩特授前件官充職者卧錦握蘭忝名曹於
南省含香視草復舊職於西垣祇荷寵光不任感懼伏
念某性惟拙直族本寒平幸逢天下之文明遂掇御前
之科第雍熙中自百里被召拾遺立朝伏蒲昧五諫之
名汗簡乏三長之譽方虞官謗遽掌綸言書堯舜之典
謨文非逮意厠淵雲之侍從路實妨賢歸田園而蓋戀
盛時踐臺閣而頗為非據邇後以執法無狀蒙恩黜官
入六里之窮山得貳車之散秩去歲量移善地甄叙通

班貼文館以讎書奉皇華而按獄屬以高堂垂老懸罄
屢空懇求郡國之權以就庭闈之養阮宣無食故拜官
而不辭毛義有親方捧檄而私喜未遑布政忽忝歸朝
十五日之專城焉知民瘼一十年之昌運薦辱君恩歷
數前賢鮮茲盛事昔憲宗覽表移韓愈於潮陽文帝經
年召賈生於湘浦比斯遭遇可謂殊尤况帳爛錦窠堦
翻藥樹爰循故事無此兼榮遠則和魯公已歷儀曹退
居主客近則趙給事拜從起部改授小祿是何繼王兵

部之清塵舉太祖朝之近例更直紫微之署已覺忝塵
郡曹玉筍之班併居清切感極而空成涕泗寵兢而如
在夢魂青瑣窻開再見壺中之日月朱衣吏引猶疑澤
畔之形容謬恩雖自於聖知公議終騰於衆口此蓋相
公洪鈞造物青律迴春用材而木屑無遺念舊而著簪
靡棄遂使蒼苔入詠復預於詞臣死灰再燃無慚於獄
吏敢不慎修儒行演暢皇猷庶憑翰墨之功少答陶鎔
之力卑情不任感恩榮懼終始知歸之至

謝除翰林學士啓

右某啓伏奉制命特授守本官知制誥召入翰林充學士者祇荷寵光不任感懼伏以漢朝故事待詔甘泉之宮唐室舊儀召對浴堂之殿自非枚馬淵雲之述作常楊元白之才名則何以塞清問於論思潤皇猷於典誥豈宜孤陋遽此忝塵伏念某植學非深屬文無取濫中懸科之選尋叨通籍之班諫署拾遺謬謬無裨於聖主承明三入清華空類於昔賢頃因坐事以左遷固亦息

心於榮路洎得歸朝之命遂求典郡之官去年召自琴
臺再陞綸閣驟荷一人之寵遇果罹三歲之凶喪雖勉
就於奪情實重違於素志顧潘安之毛髮已有雪霜念
季路之旨甘不如藜藿臨文翰而方寸亂矣對搢紳而
面目何為想石祁子之執喪空慚至行比歐陽通之起
復尚欠禮文止期卜兆於松楸再請効官於符竹豈意
未諧私願俄尋殊恩翻令朽退之材亦預深嚴之地綸
言乍降俾離紅藥之堦宸翰高懸已踐玉堂之署哀榮

交集寵辱堪驚副重華好問之心先憂學寡草武帝求
賢之詔更愧才難通宵未息於戰兢舉步猶疑於魂夢
此皆相公洪鈞造物青律迴春徵賈誼於謫官終成前
席薦相如之視草幸得同時敢不四禁是遵三緘為誠
况艱難備歷齒髮始衰用直道以事君雖無改變肆剛
腸而疾惡漸亦銷磨庶寡悔尤少副知己下情無任感
戴兢榮始終知歸之至

謝除刑部郎中知制誥啓

右某啓伏蒙聖恩特授前件職者一麾出守左遷方類
於阮咸三入承明寓直忽同於應璉祇膺寵命伏積兢
榮竊念某猥以腐儒受知先帝踐揚兩制出處九年自
知賦命之多奇每愧浮名之過實軍容捧硯敢望於輝
榮力士抹靴遽騰於謗議而自臨民淞上移任淮南飾
廚傳以屢空勾簿書而弗逮受釐宣室重求前席之期
燒藥鼎湖忽起扳髯之戀心灰自死泪血無從屬當明
主之承乾尚代藩臣而守土尋以拜章言事解印歸京

覩七月之園陵魂銷弓劍隨百官而朝謁目斷雲天放
懷書史之間結舌搢紳之內皂囊無取慙越職於伏蒲
白首為郎甘息心於執戟雖知止足猶阻歸休欲耕李
子之田園曾無二頃謀葬劉鍾之親屬何啻十喪終為
懷祿之人蓋逼有身之患豈謂內庭論薦黃閣僉諧迴
天眷之新恩復王言之舊任堦前藥樹重吟謝客之詩
觀裏桃花免動劉郎之詠此皆某官激揚公議啓迪宸
聰洪鈞豈有於棄材化筆潛徵於故事謂李杓直翰林

退職復踐掖垣白居易禁署出官終知制誥享茲殊事
實越昔賢驅瓜上之青蠅雖非由徑之夢中之白鳳深
愧演綸敢不考三代兩漢之典章取貞元長慶之風格
或少窺於邊微庶上答於陶鎔卑情無任荷德感恩激
切知歸之至

上宰相謝免判吏部南曹啓

右某啓奉今日日勅差判吏部南曹尋蒙抽取元勅者
伏以演綸西掖乃王者之詞臣按吏南曹本天官之下

士遽蒙改易深荷陶鎔伏念某比乏時才濫塵清列蒼
苔紅藥但遵四禁之文理劇剴繁久絕五花之判便于
散拙樂在清閒忽奉遣差頗增憂畏固非恥于卑賤蓋
亦事有彛倫且念判曹之名起于總章之後罷員外轉
廳之事為尚書役屬之司勾群吏之稽違奉三銓之指
顧顯為統攝自有禮容豈可職銜帶制誥之文公狀具
尊卑之數雖知不便未敢固辭豈謂相公曲為敷揚俾
諧停寢金臺閣之故事實亦公行荷廊廟之殊知且非

私謁永言感遇空極兢榮

迴寇密直謝官啓

右某啓伏以應星辰而虞山澤華省名郎直宥密而預
機宜黃樞近職兼茲重柄允屬鉅賢學士學植凌雲詞
源沃日澤宮中的科名先繼於箕裘諫署曳裾章疏獨
推於謇諤縱橫時務輝映士林佐職計司解九牛而刃
穎直言便殿折五鹿以詞雄故得峻陟中臺榮升密地
稱天心之則哲動時論於得人而又南面聽朝特頒金

紫東銓求理專委品題佇從三接之榮便叙九功之業
某幸叨知獎方切依棲自草芝泥最先栢悅豈謂學士
曲迴謙柄俯賜華牋目窺星斗之文章身負刺芒之怵
惕欽隆感戴藂集所懷卑情不任

謝僕射相公求致仕啓

右某啓伏以懸車告老大夫七十之期名遂退身老氏
五千之說其或當尚齒尊賢之代有經邦鎮俗之才雖
在期頤式存荷注縱止足之心自許執禮無違柰弼諧

之任惟艱非賢不乂伏惟僕射相公受天和氣為國善
人三朝文翰之司丹青帝典再領變調之任提振皇綱
昨以久處台司重煩耆德事均勞逸輟萬務之憂勤位
保崇高為百僚之師長永言端揆之任舊稱廊廟之官
垂行三入之恩求贊千年之運豈謂浮雲富貴脫屣簪
裾拜章既達於冕旒洒翰偏貽於臺閣是何末品亦辱
台函初謂誤傳終知殊賜兢惶無措拜受失容見大儒
之用心循先聖之獎訓不獨辭於世祿亦將激彼時風

然而上揣宸心旁詢公議咸謂老成之德宜居輔弼之
先捕虎逐麋雖鬻熊之已暮為霖作礪非傳說以何歸
况鍾洪範之康寧宜念蒼生之窮困竚覩白麻天降促
追振鷺之班黃閣洞開重見棲雞之樹社稷之謀是展
君臣之分稱隆與邦國以同休書簡編而增耀斯為善
頌且匪虛譚下情無任

迴司空相公謝官啟

右某啓伏以引年納祿達人知進退之宜養老優賢王

者得始終之道君臣之義今古同風伏惟司空相公受
夫至和為國重器皇墳帝典咸歸潤色之功禹畫堯封
盡被陶鎔之力位崇百揆年俯七旬宸心方倚於老成
達識遽辭於榮祿聖上遂其頤養峻以階資鳳凰之池
暫虛於舊位鴈鳩之秩聊示於新恩解簪紱以如遺指
林泉而自樂功成名遂早知身退之機漏盡鐘鳴堪笑
夜行之士然而四海有具瞻之任三公非致政之官激
浮躁之風式旌素節委弼諧之任終復黃扉凡在搢紳

皆傾禱頌猥蒙鈞造先賜台函仰欽止足之規彌荷謙尊之德卑情無任

迴孫何謝秘書丞直史館京西轉運副使啓

右某啓伏以列中秘圖書之府貳外司漕運之權惟是才難允歸公議學士文同三代名冠四科擅場早達於天聰獨行不隨於時態輕留侯之雜霸浪取帝師慕孟子之著書力談王道暫倅坐棠之政尋升汗簡之資閨籍通班式耀獲麟之筆轉輸劇務更觀流馬之功方切

忻怡忽承簡翰備認謙冲之旨彌增銘荷之誠衣錦畫
行雖勞於按部演綸夜直願効於前驅謹奉啓

薦戚綸上翰林學士錢若水啓

右某啓某有進士同年戚綸者負文章器識純謹君子
也其先君通五經教授於睢陽終身不求聞達兄維國
初登進士上第有文有行守道不渝游宦三十餘年今
為殿中丞綸擢第亦一紀矣歷主簿縣尹得大理評事
光祿丞司權酷于譙郡非其樂也向因讞獄寃立坐繫

烏府廷尉議罪聽以贖論既釋之矣或以前罰未塞又奪其官今會赦文合從叙用寓此佛寺出無車馬冒犯風雪袖文相過有理道評十二篇味之非空言也然而辭直意切急于救時若無知心亦恐騰口以為失路而造謗也尊道之士其將捨諸恭惟學士才與位并道與時會力開賢路之梗手築聖域之基措紳黷顯有所仰賴某罪在擯賢恩出推挽未能報德尚復言人蓋非學士之門不敢矢綸之言賈綸之毀也語曰善人在患飯

不及餐區區之心實愧斯義謹修啓事并封綸所著凡若干几閣視草之暇畧賜覽觀則綸也幸甚謹啓

迴尹黃裳啓

右某啓伏以諫垣清秩綴螭頭侍從之班史氏設官修麟筆不刊之典享此清切允屬英剋正言學士學富百家文窮三變桂籍先鳴而擅譽栢臺持憲以生風近者金闕獻書召試王褒之頌石渠載筆更伸班固之才凡在立朝共欣得雋猥蒙殊念特賜長牋載窺彪炳之文

益認謙冲之旨欽隆佩服併集所懷謹修啓事陳謝

小畜集卷二十五

欽定四庫全書薈要卷一萬四千一百五十一

集部

小畜集卷二十六

宋 王禹偁 撰

擬試內制五題 凡四副

鄉老獻賢能書賦

宮漏出花遲詩

雲州節度使加使相麻

搜訪唐末已來忠臣子孫詔

正郎告老可太常少卿致仕制

黃屋非堯心賦

春晚綠野秀詩

授六尚書節度使麻

放五坊鷹犬詔

批答處士陳搏乞還舊山表

日月光天德賦

四時和為玉燭詩

授節度使兼中書令西京留守麻

除右拾遺諸王府記室叅軍制

允邊上節度使入覲批答

崆峒山問道賦

五老化流星詩

授節度使左金吾衛上將軍制

誠諸王詔

賜漢南國王生辰金銀器鞍馬詔

鄉老獻賢能書賦

鄉老之薦
登彼天府

古者選于里舉于鄉考德行而賓之以禮興賢能而獻之于王是故鄉老之薦不濫貢士之道有光豈不以敦至教合要道察之于鄉黨升之乎俊造合議于衆寡定謀于耆老非賢不舉在百行之孔脩唯善是從非一鄉之皆好區以別矣尊而寵之察道藝而期茂表公共而滅私於以振鄉大夫之職於以行鄉飲酒之儀厥時徹讌拜書以薦遂使乎賢者能者靡至乎自媒自衒有牙見舉固於我以何求在邦必詢所欲人之知勸既而有

祿斯膺有位斯登嘉黃駿之上獻匪玄纁之下徵拜而
受所以知樂善尊老義而舉所以見推賢讓能其進也
若石之投水其用也類木之從繩然後佞倖之風不起
激勸之道自彼咸謂乎爾公爾侯亦在乎我鄉我里學
優則仕豈患人之弗知沒世不稱唯曰士之深恥故得
朝有多士野無遺賢以此取人道合于遂古以此治世
功侔乎上天乃鄉舉里選之謂信朝行夕效者焉我國
家茂育羣材躋攀太古任賢克舉於二八闡化自齊於

三五小臣待詔向金門願詣公車之府

宮漏出花遲詩

丹禁遲遲漏深宮灼灼花繁枝開正滿清韻出何賒靜
拂紅英密微穿翠葉斜依稀驚宿蝶冷落動晨鷄細逐
香離檻輕翻露滴沙願當直仙署鈴索共交加

雲州節度使加使相麻

門下臨戎閫外仗金鉞以專征定策幄中升玉堂而論
道眷惟重柄寔在全才向匪得人固無虛授其有威稜

却敵勇毅安邊式旌善戰之功別舉疇庸之典乃求吉日特舉徽章具官某劍恥一人城長萬里稟氣而全鍾太白論兵而自著金韜爰自作翰雲中威行塞外倬彼廉頗之勇略居然魏尚之英風念勞而閣列丹青已圖竒表効節而門開朱白屢奏邊功宜升調鼎之資俾耀築壇之貴雖匈奴畏懼已知域外之雷霆而黔首焦熬更作人間之霖雨詎云優異姑示甄酬於戲位極人臣榮兼將相勿期驕而伐善宜盡瘁于匪躬永保崇高何

煩訓勵可依前件

搜訪唐末已來忠臣子孫詔

勅皇王之典道在賞延公侯之家義聞必復漢帝想二
臣之壘爰求近親元和念五代之孫詔還故宅朕祗膺
駿命景慕前王慮忠孝之臣僚有替陵之苗裔將行激
勸宜示甄收應唐末已來梁朝而下或直言于昏主奮
不顧身或立事于亂邦見危致命名姓雖存于青史子
孫已混于白丁流落閭閻湮沉門閥量器能之可用委

長吏以上言庶遵有後之文更勵為臣之節人或罔冒
國有刑章凡在守臣副台深旨

正郎告老可太常少卿致仕制

勅具官某卧錦為郎懸車告老特舉優賢之典用旌知
止之心清資俾貳于奉常白首免嗟于郎署恩榮所極
汝其佩之可依前件

黃屋非堯心賦

黃屋車貴
非帝堯意

惟彼陶唐憂民道光處黃屋以非貴憲黔黎之弗康忘

彼乘輿示一人之勤儉思乎稼穡見百姓之平章不然
又安能禪位於大舜比崇於軒黃者哉豈不以天生蒸
民樹之司牧方誕敷於文德匪留心於華轂善行無迹
我則期同軌於萬方覆轍在前我則致可封於比屋盖
以樂為御德為車欲躋民於仁壽將納國於華胥苟兆
民之困矣雖萬乘以馬如憂勞於四海九州未臻富庶
顧盼而鸞旗鳳盖終類遽篠有以見上德為心下民可
畏唯惇獨以是念匪崇高兮自貴遂使麟麟之響莫達

於四聰慄慄之心常咨於庶彙自然我躬以瘠我民以肥但憲一夫而惕惕焉知四牡之駢駢足可使域中之御朽乘乾因茲而取則天下之車轍馬跡由是而知非所以道冠百王功齊五帝焦勞之德罔怠濬哲之風靡替耕田鑿井固何有於萬民神智天仁自流芳於百世今我后功邁伯禹心侔十堯處越席而古風斯振設土堦而儉德彌昭御六馬以兢兢常思罪已通八蠻而穆穆尚戒宣驕故得洪業彌芳元穹降瑞念蒼生而唯恐

無告乘金輅而未嘗介意小臣待詔於公車願比伊耆
之故事

春晚綠野秀詩

雨過川原上凝眸送晚春韶光銷欲盡野色望來新天
末逢藍嶂江湄亂翹塵垂楊難認影幽鷺莫藏身遠接
天開幕晴和草展茵明時四郊靜凌亂踏青人

授六尚書節度使麻

門下國之喉舌尚書實揔于六曹王之爪牙連帥出叅

於十乘在昔惟求于藩屏我朝復藉於循良自非文武之全才莫預邦家之慎選其有本由儒雅兼著韜鈴卻縠之禮樂詩書義之府也仲尼之俎豆軍旅兼而有之宜分經國之材各授殿邦之寄爰頒寵命式表殊恩具官某等或天賦器能或時推謇諤揚歷盡試艱之任周旋居求理之朝騰驤而龍駕乾綱俱呈步驟雍穆而鳳吹律本共洽和平暫留調鼎之恩先授登壇之柄進賢冠而納言幘已峻朝端仗黃鉞而擁白旄更光儒道仍加

食采式重分茅於戲名器不可以假人是予所慎富貴
弗期而驕至在爾熟思勉承出將之榮勿辱知臣之鑒
往踐厥位欽哉勗哉可依前件

放五坊鷹犬詔

勅王者狩必以時除災害於黎庶射而登俎表孝薦於
祖宗過此以還盡為非禮朕祇膺大寶弗敢盤遊爰自
國初因其舊制五坊設畋獵之備四海貢鷹犬之儔雖
則存而勿論未如不作無益況又青骹黃耳耗民用以

居多雨血風毛匪朕心之所欲宜從釋放式表憂勤應
五坊鷹鵠等並委本坊使即時放散所有狗犬人願收
養為警備者亦聽仍勅天下今後不得更進鷹犬庶使
發狂之言遐遵於老氏外荒之戒無愧於古書亦所以
見朕惠及於飛走也布告中外稱朕意焉

批答處士陳搏乞還舊山表

所上表事具悉昔者帝堯臨於大寶許由稱之外臣雖
居萬乘之尊不屈匹夫之志想彼貞節朕常嘉焉卿不

仕王公多歷年歲雅有神仙之態蔚為高尚之人爰自
近年屢云請見雖玉堂金闕暫喜于來朝岫幌雲闌遽
求于歸隱可認不羈之行用全獨善之心批閱奏章良
多嘉尚所請宜依

日月光天德賦

陽景陰魄
光彼天德

日月焜煌麗乎天兮秉陽既垂光于率土實耀德于宮
蒼配行健之功功深煦育叶無私之道道契皇王是何
鑿混沌之精挂義舒之影循環分晝夜之度盈縮遞歲

時之景重輪重珥為當代之休祥行疾行遲是何人之
馳騁但見乎來往天心舒陽慘陰浴咸池而杲杲逼斜
漢以沉沉仰之彌高自可侔于聖德無幽不燭固取象
于君臨藹藹晨曦亭亭夜魄覆盆雖隔于照燭圓蓋實
資于輝赫運行不息四時於是乎成功遐邇具瞻九土
以之而光宅觀其日之始也升若木拂扶桑光天德兮
臨八荒龍吐燄而氛霾蕩盡鳥騰精而魑魅潛藏於以
瑞呈五色於以明列三光月之始也出金天突瑤水光

天德兮照千里兔奔而桂影時搖蟾耀而露華輕委於
以輶碧落而皎兮於以掩繁星而嘒彼厥象昭然斯為
得天附高明而能久蘇物彙以無偏行中道而矐矐幾
彰聖代逐左旋而出沒暗送流年我國家道契貞明功
齊剛克修五事以協用照萬邦而取則夫如是叔寶之
徒宜詠歌于帝德

四時和為玉燭詩

堯舜欽天日義和正歷時銅渾列辰象玉燭照華夷真

宰潜能秉飛廉詎可吹祥光長赫矣佳號得溫其啣處
非龍首然來豈鳳胎明明方比盛鑑物自無私

授節度使兼中書令西京留守麻

門下周官重八柄之權掌之者方為崇顯洛食啓二都
之地分之者必在勲賢其有族茂山西功高天下畫像
早圖于麟閣分茅繼擁于龍旌將酬征伐之勞宜委居
留之地具官某名標鐵券勇號翹人英雄而夜拜長星
力扶興運慷慨而自稱大將誓立殊功爰膺推轂之榮

累荷殿邦之寄開白門而効死已靜邊烽按黑稍以揚
威克申戎律加以師貞之外理本尤精得士心而料敵
無遺求民瘼而所在稱理輯瑞而無違覲禮獻琛而頗
見勤王尊周之大業彌隆分陝之重權斯委仍加右相
式重大臣於戲舜號納言周稱內史極爾人臣之位表
予京邑之雄勉伸夾輔之勞無忝崇高之命可依前件
除右拾遺諸王府記室參軍制

勅朕藩屏家邦封崇子弟凡於王府必擇時才以爾具

官某文行素高才識兼茂俾為記室仍列諫垣庶令謇
謇之臣體我親親之旨曳裾載筆爾其勉之可依前件
允邊上節度使入覲批答

勅其所上表事具悉卿心懸就日役在防秋屢拜封章
堅求朝覲載叙雲龍之會請離雞鹿之閑況聞刁斗無
聲烽煙罷警足可列雲中之巨鎮歸日下之長安慰予
燕頷之思遂爾雁門之懇覽奏嘉尚再三不忘所請宜
依

崆峒山問道賦

黃帝之道
天下清淨

愚嘗歷覽皇王嘉崆峒之所請見軒轅之道光咨有德
之人所謂乎不恥下問求無為之理寧辭乎陟彼高岡
故得化臻于冲寂功格於玄黃者也原其雲紀設官弦
弧立制蚩尤俯伏以聽命風后周旋而佐帝尚憲其至
化未孚羣生未濟乃訪道於名山欲坐忘於浮世既而
金根玉輅鳳蓋鸞旗萬乘以之順動千官以之悅隨謁
帝者之師吾將學矣庶聖人之道可得聞之於是陳稽

首之儀揖龐眉之老方初筮以則告俄一言而悟道何
思何慮靡煩手以乘乾不識不知自垂衣于大寶喪天
下於忽焉得環中於自然既絕聖以棄智但牧民而御
天姑射神山只在廟堂之上華胥舊國不離樽俎之前
徒觀其御彼六龍齊乎一馬尚恭默之至道闡希夷之
大化國風穆若克清壽域之中物態熙然盡列春臺之
下故得黜彼聰明端居穆清罔象之珠有耀出虛之樂
無聲豈比夫舜舉八元方為求理堯咨四子而後化成

者哉我國家尚黃老之虛無削申韓之法令坐黃屋以
無事降玄纁而外聘有以見萬國之風咸歸乎清淨

五老化流星詩

五老知符命皤然共効靈遊河方告瑞入昴忽為星接
武傳歌詠翻身上杳冥來同聚并數去作種榆形鶴髮
光難認龍圖兆可聽至今依列宿高印遠天青

授節度使左金吾衛上將軍制

門下王者建侯行師取諸易象體國經野法彼天文外

則藩垣有仗鉞之權內則羽衛重執金之柄向非勲舊
罔與僉諧其有盡節皇家策功清廟陟師壇而且久提
禁旅以攸宜亦既得人乃頒成命具官某將門集慶武
曲儲精曾景宗箭發餓鴟百里嵩世稱達虎當年誓志
一萬戶之侯封絕塞立功五十營之兵事考勲庸而進
律分茅土以殿邦克彰作翰之勞靡怠獻琛之禮一昨
傾心象魏述職京師載成魚水之歡宜授爪牙之任爾
其戒嚴黃道警肅紫垣致高枕于宸居是予繫賴法鈞

陳于環衛在汝恪恭於戲以上將之雄兼仕官之重世
祖微時而健羨趙才沒世以垂名勉繼前賢勿替休命
可依前件

誡諸王詔

勅朕聞五帝官天下而禪讓于賢三王家天下而封樹
其子德已薄矣可不慎乎爾等生帝王之家承祖宗之
慶各踐王位且無軍功不知稼穡之艱難但受崇高之
富貴宜循禮法勿紊典彝慎爾所為必思有益朝謁之

暇友弟為娛以德以年雍雍穆穆汝或不子予敢獨親
勉行忠孝之風勿貽家國之念佩服丕訓無或忽諸

賜漢南國王生辰金銀器鞍馬詔

勅漢南國王星辰垂慶邦國有光咎陶感雲虎之祥克
符帝舜仲甫降嶽神之質爰佐姬周誕靈既在於茲辰
錫命宜遵於異數益松柏後凋之算表君臣道合之恩
與國同休予所願也可賜卿金銀器物鞍馬等具如別
錄

小畜集卷二十六

欽定四庫全書薈要卷一萬四千一百五十二

集部

小畜集卷二十七

宋 王禹偁 撰

擬試內制五題

凡四副

射宮選士賦

東風解凍詩

授御史大夫可司徒門下侍郎平章事制

恩賜宰臣一子可尚書水部員外郎制

除左拾遺直史館可開封府判官制

歸馬華山賦

笙磬同音詩

節度使起復加雲麾將軍制

允淮海國王乞落大元帥批答

右諫議大夫可御史中丞制

賢人不家食賦

乾明節觀羣臣上壽觴詩

授翰林學士承旨可依前工部尚書平章事制

奠故節度使文

宣示宰臣已下復百官轉對御劄

大合樂賦

甘露降太一宮詩

賜天下酺五日詔

批答南詔國王請東封表

授藍田縣尉可右拾遺制

射宮選士賦

能中正鵠
男子之事

稽夫古之射也觀容體別賢能建澤宮而洞啟萃貢士以雲蒸選于里舉于鄉待時而動張其弓挾其矢揖讓而升正鵠既設聲詩乃登有以知君臣之義洽有以知禮樂之道興豈不以行高于人藝推于衆與鄉老之薦充諸侯之貢試其射也當仁而雖有所爭考以德焉合禮而奚資偶中徒觀其射法有科因樂有聲采繁之詩既作翹楚之技斯呈非取其十發而九中在合于二節而五正必也射乎蓋觀德而飾禮不失職也由體正而心平

是以大射之儀既弦弧而剡矢選士之義乃張侯而設
鹄九賓既序二耦為屬于以定隆殺于以分榮辱與于
祭者所以昭乎寵光削其地者所以行乎誠勛是故五
等相叅罔遺之子男多士至止必命之鄉里其中也得
為王賓其爭也是謂君子取于德而不尚于力非蹲甲
而射之求諸已而又反諸身乃審固而中矣是謂繹志
孰云主皮煥乎得矍相之義洋洋然有闕里之儀所謂禮
無違者故得人皆仰之士有游六藝之場抱四方之志

雖中鵠而有立尚屠龍而為事將射策于金門別取穿
楊之利

東風解凍詩

習習氣初通峨峨勢自融淥波歸舊水寒片漾和風暖
想千溪綻吹疑一夜空鷺翹休映白魚躍乍翻紅繒裂
方塘上瓊流巨壑中漪漣還浩渺須賴濟川功

授御史大夫可司徒門下侍郎平章事制

門下坐霜臺而司憲振肅皇綱踐黃閣以持衡緝熙帝

載眷惟重柄允屬純臣其有首冠鴛行位崇烏府弄印
之名已著和羹之命爰行具官某堯殿神羊舜庭威鳳
五色燦補天之石四方觀測景之圭儼威容而青女司
霜薦祥瑞而黃人守日爰自位尊亞相道切致君挺屈
軼以當軒雖能指佞艤餘艎而在岼宜命濟川趙堯已
振于威稜邴吉佇觀于調燮式耀三台之位仍加五教
之資罔敢汝私益從師錫於戲君之命相唯過失是求
相之愛君唯公忠是舉勿拂人欲勿依予違躋福壽而

和陰陽寔有望于汝也欽哉可依前件

恩賜宰臣一子可尚書水部員外郎制

勅公共無獨親之義帝皇有延世之恩爰舉舊章特覃
慶澤惟爾嚴父為予大臣嘉其調鼎之功命及趨庭之
子俾升華省仍列清曹乃含雞舌之香式擢鳳毛之貴
嘻古人有垂白郎署者爾起家居之榮亦至矣慎守大
君之命免譏世祿之家負薪構堂勿忘古訓可依前件
除左拾遺直史館可開封府判官制

勅朕命大臣尹茲京輔厥惟佐職必慎其人以爾具官
某位列諫官職兼史氏俾就試難之任式彰不器之才
乃自諫垣倅于天府裨贊之道爾其勗哉可依前件

歸馬華山賦

王者無事
歸獸西岳

聖人以文德昭彰放戎馬兮功齊武王望三峰而縱逸
見萬騎以騰驤噴雪眠沙罷飲長城之窟嘶風齧草咸
歸華嶽之陽當其鎔鑄五兵蕩平九野舞朱干以在上
振木鐸而化下于以來遠人于以却走馬塞垣既靜何

為夙駕之虞國步方清莫有生郊之者所以散屈產之
乘解渥洼之駒嘶北風而何益患南牧以應無朔吹生
時免聽隴頭之水秋霜落處寧銜關上之榆已而血汗
休墜蘭筋不匱出阜棧以弄影入青山而解轡芙蓉峰
畔爭翻厯塊之蹤邏逤城邊詎見防秋之事是何驕驍
駢駢星分電飛十二就之華纓不御五千仞之翠嶺如
歸過岫幌以長鳴乍來天廡出雲關而互躍似突兵圍
永別戎車長隨野獸元黃之病何有赭白之紋自瘦既

無取於代勞亦奚資于禦寇空疑旌旆映片片之朝霞
更誤錫鸞響泠泠之山溜寧載驅而載馳任自東而自
西散亂浮雲之景奔騰逐日之蹄認巨靈于按轡想石
鼓于聞輦免隨掉鞅之人揚塵紫塞非有敝帷之費朽
骨青溪美矣夫帝道方行王師既鑠取威固在于凶器
耀德唯矜于朽索有以見太平之業今邁前王可登封
於泰岳

笙磬同音詩

鼓簧名本異拊石意何同吹擊雖殊致聲音忽暗通誰
將嶰谷韻潛合泗濱風莫問補天主休尋入海工鳳鳴
應不辨獸舞自難窮古樂何人會須知政在中

節度使起復加雲麾將軍制

門下三年之喪萬古通制雖人子盡苴麻之禮而將軍
有金革之文方資禦侮之功爰舉奪情之典其有土茅
作翰風樹成悲舊章雖聽于終喪優詔宜從于順變具
官某垂天迅翼躍冶祥金當時命未來鴻鵠曾嗟于壠

上洎風雲得便蛟龍不在于池中勇爵素高懋官斯至
築韓壇而獄立持漢節以風行旌旄方慶于趨庭荼蓼
俄悲于陟屺已過絕漿之日難終泣血之時是宜降丹
詔以推恩許墨綰而從事仍加爵秩式表哀榮於戲執
戈衛社者惟臣之忠立身揚名者惟子之孝將顯父母
勿忘君親勉樹勲庸無忝光寵可依前件

允淮海國王乞落大元帥批答

勅淮海國王所上表事具悉惟王奄有全吳世尊中夏

齊封呂尚得專諸侯之征魯祭周公宜用天王之禮一心奉上五世其昌爰歸京師且獻圖籍乃疏王爵兼領元戎匪示等威蓋旌夾輔王知止不死謙尊而光既避位以拜章可優賢而下詔旌乃賢明之德均其休逸之心聽解重權表台深旨所請宜依

右諫議大夫可御史中丞制

勅漢制大司空之下有中執法之官蓋周官少宰之任也彈奏弗法非賢不居以爾具官某昌言有聞直道自

任宜從諫署擢在憲臺且命爾專道而行專席而坐舉
劾糾禁無曠厥官可依前件

賢人不家食賦

賢國之寶
家食生客

聖人以好爵斯懸養萬物兮法上天朝有代耕之祿世
無家食之賢含糗羹藜休隱衡門之下重裊列鼎爭趨
魏闕之前豈不以養正豐財求賢輔國既審像于傳策
亦明揚于舜側馳束帛以雲委揭干旄而杓直寂寂而
永辭顏巷誰復曲肱憧憧而盡赴堯庭自期陳力遂得

四門穆穆百僚師師蓋知乎觀所養也匪謂乎飢者食之考其才而受其祿象于豐而取于頤罔敢素餐盡蹇蹇而無隱厥惟退食必遑遑而有儀是知食乃人天賢為國寶克勤乎待士之禮允叶乎養民之道法吐哺以興周笑飲酒之在鎬當年漢殿猶聞索米之言今日商山不見採薇之老自然人爵無愧君庖有加借箸競陳于籌畫漱流休卧于烟霞不僭不奢豈效何曾之室載飢載渴免同原憲之家得非畝有餘糧人無艱食君以

祿兮御下賢以才兮舉職則知進之人欲鑿坯而莫得
向使民起菜色時沉頌聲君築臺兮避債臣採櫓兮偷
生則識時之士雖竊祿以非榮方今三時不害百度惟
貞夢到華胥高枕而寧勞旰食民躋富壽還淳而盡飲和
羹士有併食儒宮成功文陣入官未免于五斗探學徒
窺於數仞將期乎鼎食鳴鐘寧虞

缺

往

缺 吝

乾明節觀羣臣上壽觴詩

甲觀正儲祥羣臣獻壽觴捧登金殿穩深照赭袍光環

佩和仙樂衣冠惹御香
玄天共悠久碧海比靈長
葵藿心無異鴛鴻翅有行
何當隨近侍同此祝無疆

授翰林學士承旨可依前工部尚書平章事制

門下天道無為運五行而亨品物聖人有作設四輔以
泰蒸民方隆大寶之基宜擇具瞻之位其有老于文學
久事絲綸貢昌言于顧問之間變古道于典謨之際宜
從禁苑擢在台司庶符命說之篇式長致堯之術具官
某尼山孕質昴宿垂精驥有德而可稱鳳非時而不下

爰自優游丹禁輝映皇家驅三代之文章雲蒸筆下慎
一人之禁密鶚立朝端諫畋獵以上書請登封而作頌
步黿頭而且久歷難樹以攸宜未離喉舌之資更受腹
心之寄沙隄金印別光東閣之榮鈴索花磚罷赴北門
之名極人臣之位資王佐之才勉思啓沃之謨勿忝崇
高之任於戲予為元首汝乃股肱推公共以為心弗私
名器事弼諧之茂業用乂邦家誠之勗之斯太平之可
致也可依前件

奠故節度使文

故某鎮節度使權重分茅功深衛社塞垣無患累朝而恃彼長城天道難忱一旦而斷乎右臂收汨對丹青之像含酸聽鼙鼓之聲特命中牢往羞烈魄表君臣之大義俾存沒以知恩魂且有知察台深意

宣示宰臣已下復百官轉對御劄

朕聞古之王者樹謗木懸諫鼓所以求已之過失也季代以還斯道云廢七人諫諍之位徒有其名百官轉對

之儀稍近于古誠為有益是謂彞章亦既寢之甚無謂也蓋以因緣兵革頽靡紀綱在下者希旨而依違莫陳利病居上者飾非而拒諫空歎覆亡朕嗣守鴻圖躬親庶政將欲立無過之地行不諱之風凡爾立朝宜遵舊典俾嘉言之罔伏期擇善而是從仍付有司悉依故事宰臣庶位申朕意焉

大合樂賦

天地之禮
張樂雍美

王者作樂崇德因高事天固大合之奏也暢至音于自

然本乎人心風俗以之而變矣考諸古道神祇于是而降焉豈不以大樂之制聖人能事于以導淳和之氣于以窒嗜慾之志必使律呂克諧宮商有次絕靡靡之邪聲表愔愔于大義以此感人而人悅以此薦神而神至其用也非八蜡以六宗其大也必父天而母地見德音之孔昭信同和而有自又何止百獸率舞丹鳳來儀亦將動孝思于嚴配暢和樂于華夷皞如繹如所謂樂之大者載考載拊乃得神其聽之徒觀夫其儀濟濟大合

之樂兮發而中禮于以用之兮配至誠于祖禰其聲洋洋
大合之樂兮發而有章于以用之兮表至德于皇王匪
但崇牙設猛簠張金石間作干戚成行然後稱為雅樂
哉夫樂之設也非管非籥樂之用也唯淳唯朴若非審
音以知政安能制禮而作樂聽之忘味佞邪之道弗興
和而不淫廉正之風有覺是以大合之樂其樂雍雍用之
于圓丘方澤施之于除禪登封豈鐘鼓云乎姑悅人之耳
目異鏗鏘而已失盛德之形容我國家韶濩登歌咸英

盡美復變樂于正雅黜鄭聲于滛滛自然天地効靈耿
休光于大祀

甘露降太一宮詩

甘露霑長空垂休太一宮瑞光經日在聖德與天通如
醴霑衣白凝脂間葉紅淋漓滴層漢顧眄駭重瞳五色
名難比三危味莫同祇應書信史千古仰玄功

賜天下酺五日詔

勅古者禁諸羣飲所以節用而豐財賜以大酺所以布

德而施惠禁之或慢則糜穀滋多賜之不行則屯膏是
歎稽乎歷代寔曰彛章自唐室亂離中原多事廢茲恩
惠積有歲年朕負荷丕圖躬親庶政唯思旰食弗敢酒
荒幸以宗廟降靈乾坤垂祐屬方隅之無事思黎庶以
同懽特隆五日之酺式表一人之意可賜天下大酺五
日仍令所在官給酒食

批答南詔國王請東封表

勅南詔國王某所上表事具悉卿勤王歲久望闕情深


特推北拱之心遠有東封之請嘉賞之外愧恥良多朕
聞封禪之儀皇王大禮苟非功格天地澤被昆蟲雖力
行于一時終取笑于千古矧在涼德敢誣介丘况燕土
未平河流屢決中夏之人懼於羗戎多稼之田墊於水潦一
念至此惻瘝乃心而又鄣黍江茅東鷄西鰈未之有也
泰山梁甫匪予意焉卿當善育人民謹奉正朔登封之
請以俟治平誕布朕心固宜知悉所請宜不允

授藍田縣尉可右拾遺制

勅王畿釋褐諫署曳裾清要之資非才不授咨爾具官
某以文學登第以廉平効官特授侍從之班副我歲規
之望朝有遺政爾其拾焉勿虛諫垣以忝休命可依前
件

小畜集卷二十七

謹案卷二十五第五頁前七行濫肩仕進之流刊
本肩訛有據別本改



總校官庶吉士臣張能照

校對官中書臣金光悌

膳錄監生臣胡金芝

膳錄舉人臣龐兆懋